

Anpezan a šcora

‘L é con gran sodišfazion che ve conton de ra prima lezion de anpezan

Parlon de šcora mešana, gouja che ades, pian pian, se šcomenza inze dutes a podé insegnà el ladin a ra lun del soroio. ‘Šte ultime ane ‘l èa štà nafré parecià el tarén ma ades, dapò che ra leje par ra minoranzas ra diš che se pó, infinalmente se insegna ra lingua anche ai Ladis fora de ra Rejon Trentin - Südtirol.

In Anpezo, a ra šcora mešana “Rinaldo Zardini”, ra profesoresa Giuliana Bellodis “Šmalza” r’èa šcomenzà a fei conoše ai pize paroles curtes e longhes, che se dora e che no se dora cuaji pì. R’è štada bona de inderetà chi che ra šcotàa, tanto che i èa dute beate e contente.

Io ei abù acaro de šcotà ‘na tosata de ra šcora che ra m’èa contà duto ce che i à fato e cuanto contente che i é štade de podé inparà algo de noo, gouja che no dute parla anpezan a ciasa. Ei parlà anche con Giuliana che ra m’èa dito che d’inultima, canche r’èa fenì, i é vegnù no s’i cé a pensà a dute chi che, par tante anes, i s’èa batù, i à tegnù duro, i à seguità a parlà, par no perde duto. R’èa dito: *“M’ei pensà de Abele Diorništa, de chi che à betù su r’Union de i Ladis d’Anpezo, de chi che, ades e ignante, i r’èa fata šì inaante, de dute chi che à lourà par tante anes, con pazienza, par fei el vocabolario e ra gramatica, che prešto ra sarà pronta, de chi de ra Regoles d’Anpezo che à betù sode parceche chesto podese èse fato. De dute chi che à šcrito e šcrie par no dešmenteà el noš saé”*.

Cošì ades podon šperà che el noš bel anpezan el no vade pardù e che tante de ‘šte tošate i pode, un doman, saé algo de pì. Un colpo, par television, i parlàa propio de ra lingues che vè a morì e i dijea che ogni parola che se perde, che se dešmentea e che no se dora pì ‘l é ‘na perdita par ra umanità intiera, de un saé che no tornarà pì.

Elsa Zardini “Soriza”